

玄覽堂叢書

第二冊



商乘序

蓋余嘗橫襟而窺大宇之寥

廓歎窮無窮極無極希蹤于

人所不到之區而陸步自畫

不能為域外之曠觀埒井蛙

之于東海適適然驚規規然



自失也夫夫也食君食而去  
疆場可無張騫傅介子之選  
思乎乃吾年友翹仰揚公饒  
為之公嘗治兵西垂大展雲  
中籌畧以上功晉秩今且控  
越海之三郡而兩要區屹然

藉保障也東西之觀躬跡之  
矣

國家承平日久武備濶畧公時  
時蒿目以憂邊計乃纂裔乘  
以志先憂凡燠蒿臬矚之邦  
常講堯幕之長梯抗琛責解

辯蹶角以至山川阻深隔閭  
聲教者靡不別其種類肖其  
風俗悉其所為制馭之筭余  
因是而獲窮無窮極無極也  
夫以三代綦隆越裳三譯受  
命于國之黃耆以滄海不波

為盛事祖龍揆山海狝焉啓  
疆而因自促其世漢天子以  
夫人行媚虜而唐宗馬嵬糲  
食蹙國于漁陽之鞞鼓則未  
有如我

朝威震三犂控弦萬里窮髮為

序  
編戶者比年以來紐于養寇  
消難作易靡之戰氣而恃易  
靡難固之款心昔之款虜挾  
其戰以要我今之款又挾我  
之不得不款以制我戰而款  
則款之權我操之不戰而款



則款之權彼握之且吾以利  
餌虜而倭亦以利餌我國人  
我失其所御以餌虜而又失  
其所御以受倭之餌

皇上出金錢于塞北而奸民牧  
之于海東出之者可必其不

來而收之者不可必其不玄  
至于建州海西砭肌剥膚不  
能戰不能款以微倖其不至  
築京訊馘無足懾我心而白  
山木葉之間有隱疹焉溫焉  
戶逐之境有伏阱焉遡觀前

代四夷何嘗不款漢能戰以  
警單于故款固而末世猶享  
款塞之利唐不能以戰警突  
厥然亦不忘戰故款雖不固  
亦無金繒歲益之患宋則戰  
款兩失之而卒貽靖康之禍

我

國家有漢唐之全盛而無漢唐  
之強無宋室之偏安而有宋  
室之弱

穆清之暇試取商乘展卷披閱  
彼東西南北嵩堅距銳如猛

獸狎獰在在思湖四面環向  
窺伺為我敵國而吾所以制  
馭之惟在葆合腹心之元氣  
以潛消四肢之癥結顧自權  
鑿四紛採樵疊出西寧東茂  
播州皮林之役瘡痍未起則

憂在內地時情水火議論導  
皆緩四夷之捍禦而急同室  
之戈矛則憂在

內廷此其為腹心之患形見勢  
輒將菀枯散為瓦解彼四封  
之伺隙雖未履及皇劍及門

車及市而識者已竄色而却  
步慮在四夷先矣昔郭玉之  
療貴人也承以怖懼而意不  
盡曰貴人之難療也在自用  
意而不用臣如其用臣則吾  
必以四夷考進

天子有道以四夷為內守有警  
則釋四夷為外懼蓋不敢為  
張騫傅介子之驚遠功而第  
如史佚之告成王者曰使之  
以時而敬順之忠而愛之布  
令信而不食言則越裳三譯



將稽顙

朔下而東海波臣得嘗咏太平

之盛矣

萬曆乙卯孟夏朔日

賜同進士出身嘉議大夫瀨江

等處提刑按察司按察使前

以軍功陞職

予賚奉

勅提督湖廣通省學校副使年

弟王在晉頓首拜認



裔乘目錄

東夷卷之一

朝鮮

日本

渤海

新羅

百濟

靺鞨

南夷卷之二

安南

占城

真臘

爪哇



暹羅

三佛齊

滿刺加

討來思

沙哈魯

答兒密

巴喇西

交欄山

大唄喃

小唄喃

刺撒

九州山

馬八兒諸國

賓童龍國

重迦羅

西夷卷之三

東西番卷之五

哈烈

天竺

默德那斯

天方

白松虎兒

阿速

納失者罕

忽魯思思

詔納撲兒

榜葛刺

失刺思

哈失哈力

阿哇

西夏

回紇

党項

烏孫

吐谷渾

木波

阻卜

鼻骨德罕

北夷卷之四

北虜

兀良哈

室韋

鬼國

奚

敬烈

木不姑

烏古

東南夷卷之五

琉球

忽魯謨斯

蘓祿

彭亨

古麻刺

龍牙犀角

鐵驪

曷蘓館

三嶼

兀惹

蒲盧毛朶

蒲里奴

東北夷卷之六

女直

西南夷卷之七

蘓門答刺

佛菴

北覽邦

婆羅門

呂宋

錫蘭山

東  
百花

渤泥

祖法兒

柯枝



阿丹

阿魯

淡巴

小葛蘭

花面

古里

古里班卒

瑣里

西洋瑣里

碟里

甘巴里

合猶里

火刺札

蘓門達那

白葛達

黑葛達

黑婁

麻林

加異勒

敏真誠

日羅夏治

打回回

乞力麻兒

亦思把罕甘

八答黑商

牒幹

溜山

龍涎嶼

南淳里

卜刺哇

那哈

麻逸凍

假里馬丁

竹步

吉里地悶

黎伐

龍牙門

西北夷卷之八

哈密

赤斤蒙古

罕東二衛

曲先

安定阿端

沙州

火州

土魯番

于闐

亦力把力

撒馬兒罕

魯陳

沙陀

黠戛斯

益蘭

吉利吉思

西撼合納

謙州

謙河

龍涎嶼

吉里亞國

察刺哇

撒馬兒汗

蘇克凍

裔乘東夷卷之一

閩漳浦楊一葵翹卿父著

朝鮮

朝鮮東夷也為箕子封國其初國俗未聞及箕子教以禮義田蠶其風乃稍稍淳厚與三方異焉傳四十餘世為戰國時朝鮮侯見周衰燕自尊為王將東畧地遂亦稱王欲興兵擊燕其大夫禮諫之乃止使禮西說燕燕亦遂不東後燕

國無民何以君  
此七日矣

遣將秦開攻其西方取地二千餘里朝鮮稍弱  
及秦并天下使蒙恬築長城朝鮮王否畏秦襲  
之佯服屬秦然不肯朝會否死其子準立會陳  
項兵起燕齊趙民多亡歸準漢初燕人衛滿亡  
命詣準準封之百里命守西邊滿因擊破準而  
自稱朝鮮王至孝惠高后時遼東太守奏約滿  
為外臣保塞外以故滿得兵威財物侵降其旁  
小邑凡穢貊高句驪沃沮真番辰國皆屬焉傳

至右渠負固不服元封初襲殺漢使漢遣楊僕  
荀彘誅右渠以兩將不相能師久無功頃之尼  
溪相參使人殺右渠來降先是穢君南閭等二  
十八萬口降置蒼海郡及定朝鮮瀛直為真蕃  
臨屯樂浪玄菟四郡而以高句驪沃沮為縣昭  
帝時罷臨屯真蕃二郡而併於樂浪玄菟高句  
驪者其先夫餘種也夫餘嘗得河伯女因閉於  
室為日影所照遂孕生一卵大如五升破而得

一男及長字之曰朱蒙俚言朱蒙者善射也王  
令養馬蒙私以馬駿者減食令瘦鴛者善養令  
肥王以肥者自乘瘦者給朱蒙王狩給朱蒙一  
矢殪獸甚多王謀殺之朱蒙遂棄其母與馬達  
等二人東遇河難濟追者且至朱蒙曰我日之  
子河伯外孫也今柰何俄而魚鼈成橋朱蒙得  
渡遂至訖升骨城居焉號曰高句驪因以高為  
氏朱蒙死傳至孫莫來其人性凶急習戰關沃



沮東穢皆屬焉雖已置為縣後稍驕不服王莽  
初發句驪兵伐胡不行強迫之遂亡出塞莽令  
嚴尤誘驪侯騶斬之傳首長安於是寇邈愈甚  
及光武興罷兩郡都尉官仍以穢及沃沮地封  
其渠帥為侯而遼東太守祭彤威信素著於是  
高句驪穢貊倭韓夫餘諸國來獻倭即日本另  
有志韓有三種曰馬韓國五十四曰辰韓國十  
二曰弁辰國六十二合四千餘里皆古辰國也

而馬韓為最大初朝鮮王準為衛滿所破遂將  
餘衆千人攻入馬韓為王準卒韓人復自立辰  
韓者耆老自言秦之亡人避苦役造韓相呼有  
似秦語風俗尚禮勝於馬韓并辰國近倭故頗  
有文身者三韓自漢晉以來朝貢不絕後為新  
羅百濟所併夫餘東明之裔也東明母為北夷  
索離國侍兒東明長而善射王忌欲殺之東明  
南奔至掩淲水以弓擊水魚鱉皆聚浮水上東

明因渡至夫餘為王漢晉以來朝貢及阿保機  
滅夫餘改東丹府遂絕後高句驪王宮勇壯數  
犯遼元興初寇遼東耿夔擊破之元初建光時  
輒與穢貊馬韓鮮卑人入寇圍玄菟殺掠吏民  
數千人遼東太守蔡諷戰沒夫餘王乃遣子尉  
仇台將兵來援并力討破之東垂稍安宮死傳  
子遂成孫伯固時桓靈失政復入寇掠玄菟太  
守耿臨討之伯固降乞屬玄菟云伯固卒子伊

夷模立建安中公孫度擊破之有其國夷模更  
作新國於丸都山下居烏伊夷模死子位宮立  
有勇力便鞍馬善獵射泛晉擊公孫氏有功勢  
遂滋盛魏正始初寇遼西安平幽州刺史毋丘  
儉擊走之儉使王頎追之絕沃沮千餘里至肅  
慎南刻石紀功而還頎問其耆老海東復有人  
不耆老言國人嘗乘船捕魚遭風至一島語言  
不相曉俗常以七月取童女沉海又一國在海

中純女無男撒地而孕胸前無乳項後生毛中  
有汁乳子百日能行三四年則成人矣又海岸  
邊有兩面人項中復有面生得之與語不通不  
食而死又得一布衣泛海中出身如中國人衣  
其兩袖長三丈蓋沃沮東界之極也晉時立宮  
五葉孫釗為王慕容皝擊破之掠萬餘口焚其  
宮毀九都城釗尋為百濟所殺於是遂徙都平  
壤即樂浪也及慕容寶以句驪王安為平州牧

封遼東帶方二國遂畧有遼東郡勢復振至晉  
安時安孫高璉獻赭白馬晉封為高麗王凡四  
傳而湯立自東晉宋至於齊梁後魏後周其主  
皆受南北兩朝封爵分遣貢使其後國漸大湯  
卒子元立元率靺鞨兵寇遼西煬帝徵元入朝  
不至煬帝遂親征之高麗嬰城固守隋食盡諸  
軍多敗績乃班師還然而高麗亦困弊遣使乞  
降元死子達武嗣唐高祖初兩遣使入朝唐拜

建武為上柱國封高麗王頃之新羅百濟上書  
言高麗王建武閉道不得朝且數侵入高祖詔  
使朱子奢諭和是時太宗已擒頡利建武懼請  
與二國平且賀滅突厥并上封域圖復遣太子  
桓權入朝獻方物帝厚賜賚詔使者陳大德持  
節荅勞且觀其釁大德悉得其纖曲還報太宗  
大喜於是遂有征高麗之意矣遼高麗有蓋蘇  
文為東部大人殘凶不道諸大臣與建武議誅

之蓋蘇文覺詒殺諸大臣及建武而立建武弟  
之子藏為王自為莫離支專國柄莫離支即唐  
所謂兵部尚書中書令也太宗聞建武為下所  
殺遣使吊祭乃拜藏為高麗王會新羅遣使者  
上書言高麗百濟來攻太宗以書讓高麗使未  
至而蓋蘇文已取新羅二城矣李勣勸上討之  
帝意遂決乃遣將李勣李道宗孫伐音張亮契  
苾何力等泛上親征又發契丹奚新羅百濟諸



君長兵悉來會於是勅拔牟城以其地為蓋州  
孫伐音拔白崖城以其地為嚴州勅遂圍遼東  
城帝至見士卒填塹分負之重者馬上自持之  
群臣震惧爭挾硯以進因乘風縱火城潰以其  
地為遼州遂引軍次安市城會高麗南北部傳  
薩高延壽高惠真率靺鞨之衆十五萬來援上  
夜召文武躬自指麾大破之延壽惠真降上悉  
授其酋長以戎秩命還平壤靺鞨三千人並坑

之因名所幸山為駐驛山命許敬宗為文勒名  
紀功時貞觀十九年也太宗崩高宗立藏遣使  
奉慰後新羅訴高麗靺鞨奪三十六城詔程名  
振等擊勝之無何蓋蘇文死子男生代為莫離  
支與弟男建男產相怨男生入朝求援而蓋蘇  
文弟淨土亦請割地降乃遣李勣率契苾何力  
薛仁貴龐同等討之會侍御史賈言忠計事還  
帝問軍中云何對曰必克高麗秘記云不及九

百年當有八十大將滅之高氏自漢有國今九  
百年勦年八十矣虜仍薦饑人相掠賣地震裂  
狼狐入城蚡穴於門人心危駭是行不再舉矣  
未幾勦圍平壤藏遣男產率首領降而男建猶  
固守大將浮屠信誠遣謀約內應遂入火其門  
執藏男建等所收凡五部百七十六城戶六十  
九萬獻俘昭陵凱而還高宗赦之各授以職分  
其地為都督府九州四十二縣百復置安東都

護府擢首豪有功者為都督刺史而以薛仁貴  
為都督總兵鎮之藏以永淳初死高氏自是絕  
王矣垂拱中以藏孫寶元為朝鮮郡王唐末中  
原多事遂自立為君長至浚唐明宗時權知國  
事王建代高氏并有新羅百濟地益廣東徙松  
岳以平壤為西京遣使朝貢封為高麗國王建  
卒子武立武卒子昭立王氏三世終五代常來  
朝貢其立必請命中國常優答之周世宗時高

嚴王昭進別叙孝經一卷越王新彖八卷皇靈  
孝經一卷孝經雌圖一卷別叙者叙孔子所生  
及弟子泛學之事新彖者以越王為問目皇靈  
述延年辟穀雌圖載日食星變皆不經之說也  
宋太祖建隆初昭遣使朝貢昭卒子伯立伯卒  
弟治立先是高麗遣國人金行成崔罕王彬等  
詣業國學後俱登第於是朝貢不絕無何遣使  
言契丹寇境宋以夷狄相攻固其常不可輕動

干戈為國生事由是高廉受制於契丹朝獻中  
絕矣治卒弟誦立誦卒弟詢立會契丹攻陷高  
廉六城詢徙居避之尋結女真擊殺契丹殆盡  
勢稍稍振遣使入貢宋為置館於登州海次以  
待使者詢卒其後不通中國者四十餘年至詢  
孫徽立復遣使入貢表求醫藥盡愬之工詔許  
之高廉俗不知醫有病惟呪咀厭勝自此始有  
通醫術者宋以其國尚文每賜書詔必選詞臣

著撰所遣使者必試以文乃往而高嚴之待中國使亦甚恭徽在位政尚仁恕為東夷良主然其俗王女不下嫁臣庶必歸之兄弟宗族貴臣亦然次子運諫以為既通上國宜革故習不泛及運嗣遂稍稍變其夷風運仁賢好文每賈客市書至則絮服焚香對之貢使至輒市太平御覽文苑英華并諸書甚衆運卒凡四傳而楷立貢使接踵賞賜不貲而郡縣供頓騷然煩費民

始稱因烏高麗自王徽以降雖累年通使中國  
然受契丹封冊奉其正朔歲凡六貢契丹而契  
丹猶誅求不已常曰高麗我奴耳南朝何以厚  
待之使至其國尤倨暴館伴及公卿小失意輒  
行摔筭我使至必假他事來覘分取賜物云初  
女直奴事高麗及其強也高麗反臣事之高宗  
初恐高麗通金人遣胡蠡等使高麗而金亦憂  
高麗為我用遣王樞持冊往彼此相持蠡回復



募能使絕域者於是楊應忱奉詔請行言由高  
廉至女直路甚徑請身使三韓結鷄林以圖迎  
二聖詔可遂由杭州浮海三月抵高廉諭王楷  
以往女直意楷有難色具言金人見造舟將往  
二浙若引使者至其國異時欲假道至浙何以  
荅之應忱畱兩月餘不得已受其拜表而回後  
高廉亦遣使入貢然勢逼於金其奉中國不及  
元豐以前時矣及元初契丹人六哥等領衆九

萬餘竄入其國元太祖遣哈只吉劄刺等從之  
高麗王奉牛酒出迎遣將趙冲共討滅六哥劄  
刺與冲結為兄弟冲請歲輸貢賦自是後元每  
遣使趣其入貢而後進方物為元太宗時從高  
麗王瞰瞰請和許之置京府縣以達魯花赤七  
十二人監之遂班師頃之瞰盡殺元所置監以  
叛率衆竄居海島元命福源領其衆瞰復攻之  
福源遂遷居東京而元賜佩金符命同將唐古

攻瞰瞰於是再入貢憲定間歲貢不入凡四命  
將征之瞰遣世子植入朝瞰卒元命植歸國嗣  
王植以元冊封故終世祖三十一年入貢凡三  
十六島是時元遣兵侍黑的等使日本以高麗  
與日本隣令為嚮導植遂遣使導徃日本不至  
而還元與高麗自此隙矣然歲貢如故後植世  
子慍入朝奏言本國邪臣林衍廢植立渴事元  
大怒發兵征之而復王植故位詔西京內屬改

為東寧府植死子懃立後更立昨以尚元公主  
故賜以駙馬高麗王印而加號特進上柱國開  
府儀同三司從東行中省左丞相駙馬高麗王  
云成宗時哈散使高麗還言昨不能服其衆宜  
遣官共理之遂復立從東行省命濶里吉思為  
高麗行省平章政事未幾復罷昨卒凡三傳而  
王暉嗣王氏自建立國至暉凡二十八王歷四  
百餘年矣我朝洪武二年王暉表賀即位遣

符寶郎僕斯齋金印

誥文封顯高嚴國王而

祭其境內山川使者入謝

上送容問王居國

何為使者頓首言東海之波臣朝夕禮覺王甚

恭他未遑也

璽書諭王佛法非所以治國王

其毋惑王國北接虜而南鄰倭虜創于此恐將

逸于彼倭狡而貪且窺王虛實惟王念哉因

賜以經史諸書中書省臣言高嚴使者往來為

市非恣請徂其入而禁其出不聽五年顯遣吳

季南等貢方物請徙暹羅國所留蒙古人及他  
蘭秀山之逋逃者防其為寇 詔暹羅國乃爾  
附庸蒙古亦人也蘭秀山逋寇示以朕詔傳檄  
可致耳勿用兵便七年諭中書省臣以高廉貢  
使煩數使者溺海幾不還甚失朕意丞相其明  
以諭王八年顓弒死禍嗣禍國人所立非顓子  
也貢不如期却之羈其使周誼仍 勅遼東守  
臣絕勿通十七年請謚及嗣封不許十八年許

之明年貢馬千匹布萬疋謝請易冠服不許頃  
之指揮高家奴等市馬高廉還言高廉王禍表  
請不受馬直 上令償之時遼陽潘城民之避  
亂於其國者甚衆勅高廉送還禍遂遣使以遼  
潘流民柰朶里不歹等戶四十五口三百五十  
人來歸二十一年國相李仁人廢禍而立王昌  
兩請入朝皆不許仁人子成桂復廢昌立瑤未  
幾而廢瑤自立王氏自五代至今數百傳而始

絕其國評議司表言禍昌不當立瑤暴霍失人  
心國虛無人成桂賢當立 上以遠夷置不問  
成桂更名旦徙居漢城遣使請更國號 詔仍  
號朝鮮二十八年入貢表語謾遠撰表者鄭集  
羈留之既而旦請老子芳遠嗣永樂元年請冕  
服經籍 詔許之芳遠聞朝廷欲廣屯田遼東  
遣使貢牛萬頭 命戶部賜布四萬疋絹如其  
牛數又 賜其王文綺表裏各百疋十三年芳



遠表立子禔為世子是年請老子禔嗣宣德元  
年遣使 賜禔五經四書及性理大全綱目通  
鑑四年禔進海東青 制詔珍禽異獸非朕所  
貴其勿進方物效誠而已毋金玉器禔再進再  
諭之已請遣子弟入學不許仍 賜諸書俾學  
于國中正統四年建州夷酋凡察童倉逋居朝  
鮮界上別酋李滿住以為言 詔問禔亡何凡  
察歸建州彼此相購 詔解之且 諭慰禔

國家以王為東藩如凡察直夷蓄之何敢望王  
彼其懷鳥獸心太留無恒王第善自備毋與較  
景泰元年 賜禔世子珣冕服禔卒珣嗣三年  
卒子弘暉嗣稗而孱遜其叔璠天順三年邊臣  
疏璠私通建州夷酋董山又殺毛璘酋郎卜兒  
哈 詔戒諭之成化三年進海青白鵲却不受  
時方祗建州璠遣中樞府知事康純等率兵捕  
斬李滿住及其部落使來獻俘 賜璽書褒嘉

之明年璪卒子晄嗣六年晄卒澁子嫫嗣復出  
兵助擊建州提聞遣中使賚王金幣并及其將  
士弘治八年嫫卒子慆嗣慆病風遜其弟懌嘉  
靖二十三年懌卒子崐嗣未踰年卒子垣嗣時  
日本入寇舟漂至朝鮮及姦民往來海上私與  
倭市垣輒捕以獻 上亦厚賜予荅之隆慶元  
年垣卒澁子松嗣萬曆二十年日本関白平秀  
吉遣將攻朝鮮直抵王京松遁去一國為墟遣

人上表請援 上命侍郎宋應昌往經畧之諭  
年相持不退兵部尚書石星輕聽沈惟敬言令  
以遊擊往諭日本罷兵惟敬陰許和且許復寧  
波貢道事泄擒惟敬下石星獄寘重典于是再  
命薊遼總督邢玠代應昌調總兵李如松如栢  
劉綎陳璘等五道兵伐之遂克平壤平秀吉盤  
據釜山大搆城郭宮殿為久駐計二十六年會  
秀吉病卒彼國多事敵兵撤歸我兵量畱付經

畧使者統領鎮守朝鮮復國如故今十餘年朝  
貢不二奉正朔惟謹邊陲無事中國始得息肩  
矣李氏自成桂以來事 朝廷恭歲時朝貢慶

慰報謝無常期王嗣立則使者往封有事則頒

詔其國他夷不敢望也始成桂立 高皇帝

雖置不問然心惡其篡而傳者復以成桂為仁  
人子故會典載其父子先後弒王氏四主其後  
嗣當永樂正德嘉靖間累表自白言恭愍之弒

由嬖臣倫仁人誅倫立禍禍既立則遣兵侵遼  
東先臣成桂惧干上國返其兵禍遂遜位于子  
昌而恭愍妃安氏以禍昌皆非王氏不當立乃  
黜昌立瑤瑤復不道國人請命高皇帝立先  
臣贍瑤別邸終其身先臣實未嘗為弒而虛蒙  
此聲又家世出新羅司空故以為仁人子皆冤  
甚乞下史館昭雪今上初乃得請云其地東  
西相距二千里南北四千里分八道中曰京畿

東曰江源本穢貊地西曰黃海古朝鮮馬韓舊  
地南曰全羅本卞韓地東南曰慶尚乃辰韓地  
西南曰忠清皆古馬韓域東北曰咸鏡本高句  
麗地西北曰平安本朝鮮故地分統郡府州縣  
其忠清慶尚全羅三道地廣物衆州縣雄巨最  
為富庶俗尚詩書人才比諸道倍多平安咸鏡  
二道境接靺鞨俗尚弓馬兵卒精強東西南瀕  
海北鄰女直西北抵鴨綠江其設官畧倣中國

以田制俸刑法不苛俗柔謹崇釋尚鬼惡殺茅

居苧衣知文喜讀書上下威儀燦然可觀烏其

山川丸都伊夷模神嵩王建北嶽李旦依蓋馬

大山即東沃沮國地海鴨綠江為大產金銀鐵水晶鹽

細苧布白硃紙狼尾筆果下馬長尾雞貂獬海

豹皮八稍魚昆布杭黍麻榛松人參茯苓其貢

道由鴨綠江歷遼陽廣寧入山海關達京師成

化中苦女直邀劫請改道職方郎劉大夏持不



可議遂寢

外史氏曰。朝鮮蓋箕子之遺也。其後凡四易姓。然柔馴好禮風固存焉。至如漢之右渠。晉之宮。隋之元唐。之蓋蘇文。背逆猖獗。何其橫也。廼臣服我。明奉朝請。惟謹。至今不絕焉。是豈不誠卓越前代哉。



日本

日本古倭奴國也居大海之東國有五畿三島  
七道六十五州附庸國百餘小者百里大者四  
五百里各自專擅不相統攝漢滅朝鮮通使稱  
王者三十餘國初王都筑紫日向宮名御天中  
主其次為天村雲尊累傳皆稱尊傳二十三世  
神武天皇遷都太和州疆原宮自稱天王其後  
遂以天皇稱建武初奉貢朝賀光武賜以印綬

至桓靈間國大亂無主有一女子名卑彌呼能以妖術惑人年長不嫁國人共立為王侍婢千人少有見者惟一男子傳令而已曹魏既平公孫氏倭女王遣大夫難升米等來貢獻魏封卑彌呼為親魏倭王難升米等並拜中郎校尉自是貢使往來不絕女王死更立男王國人不復相攻擊不休復立卑彌呼宗女壹嗣為王亂遂定壹立朝獻如初後復立男王並受中國爵命

歷晉宋齊梁朝聘不絕隋開皇中倭王姓阿每  
字多利思比孤遣使詣闕上令所司訪其風俗  
使者言倭王以天爲兄以日爲弟天明出聽政  
跣趺坐日出便停云委我弟文皇曰此大無象  
令改之大業初復遣使朝貢使者曰聞海西菩  
薩天子重興佛法故遣朝拜兼沙門數千人來  
學佛法其國書曰日出處天子致書日沒處天  
子無恙云云帝覽不悅謂鴻臚卿曰夷書有無

禮者勿復以聞明年遣裴世清使倭度百濟所  
歷有秦王等十餘國惟秦王國其人與華夏同  
蓋即秦所遣方士徐福將童男女數千人入海  
求蓬萊仙不得懼誅止夷澶二州號秦王者其  
國世屬倭王聞世清至使數百人設像仗鳴鼓  
角來迎既至國王多利思比孤大悅曰我聞海  
西有大隋禮義之國故遣朝貢今清道飾館以  
待大使莫聞大國維新之化世清曰皇帝德並

二倣澤流四海故遣行人來諭王命使隨清入  
貢唐貞觀中遣使朝貢唐亦遣刺史高仁表往  
諭之與王爭禮不平不肯宣命而還久之其王  
孝德立敲琥珣大如斗瑪瑙若五升器時高麗  
百濟數侵零新羅高宗令出兵往援孝德死二  
傳而天智立遣使者與蝦夷人偕朝蝦夷人亦  
居海島中其使者鬚長四尺髮上指善弓矢珥  
箭於首令人戴匏立數百步射無不中者天智

死子天父立天父死子惣符立咸亨初遣使賀  
平高麗後稍習夏音惡倭名更號日本使者自  
言國近日所出以為名云長安初遣朝臣真人  
栗田貢方物朝臣真人者猶唐尚書也冠進賢  
冠頂有華薦四被紫袍帛帶其國初無冠於隋  
得所賜冠始為冠亦無文字刻木結繩於百濟  
國得佛書始為文字栗田好學能屬文進止有  
容武后授以司繕卿官還之開元初栗田復朝



請送諸儒授經詔四門助教趙玄默即鴻臚寺  
為師後悉所賞物貨書以歸其副朝臣仲滿慕  
華不肯去易姓名曰朝衡授以官職久之多所  
該識乃還後復入朝擢官如故建元初遣真人  
興能來貢善書其紙如蠶而澤人莫能識也時  
王名白璧自摠符後女王二男王五至此凡八  
傳矣貞元末王栢武遣使入朝其胄子楠免勢  
願留肄業歷二十餘年使者來請免勢等還詔

漫之大中中日本王子來朝獻寶器音樂王子  
善圍碁出楸玉局冷煖玉碁子楸玉文如楸木  
琢之為局光潔可愛其玉碁子不由制度黑白  
自然冬溫夏暖故名宋雍熙初日本僧奝然與  
其徒五人浮海而至獻銅器十餘事并本國職  
員今年代紀各一卷奝然善隸書而不通華語  
問其風土但以書對書言國王世以王為姓文  
武官僚亦然所載世次名號甚詳與本史阿每

氏者不同喬然之來也持有孝經一卷越王孝  
經新義各一卷皆金縷紅羅標水晶為軸孝經  
即鄭氏註者越王乃唐太宗子越王貞新義者  
記室參軍希古等撰也喬然求印本大藏經詔  
給之復隨台州商人船還其國數年遣弟子奉  
表來謝表辭頗工其畧云傷鱗入夢不忘漢主  
之恩枯骨合歡猶亢魏氏之敵望落日而西行  
十萬里之波濤難盡碩信風而東別數千里之

山嶽易過得觀宇內之瓌竒敢辭荒外之跋涉  
遂使蓮華迴文神章出於北闕之北貝葉印字  
佛詔傳於東海之東伏惟陛下惠溢四溟恩高  
五嶽世超黃軒之古人直金輪之新在彼在斯  
只仰皇猷之盛越山越海敢忘帝德之深縱粉  
百年之身何報一日之惠染筆拭淚伸紙搖魂  
表奏上賜賚遣歸咸平初建州海賈周世昌遭  
風飄至日本凡七年得還與其使至世昌以其

國人倡和詩來其詞彫刻膚淺無足取也景德  
初僧寂照至熙寧間僧誠尋至宋待之加厚賜  
紫方袍自是連貢方物而所遣皆僧烏溥熙以  
浚明州秀州泰州等處徃徃有日本海船飄風  
而至者無口食行丐塗中上詔給常平米贍恤  
之候便風遣歸元世祖時遣黑的趙良弼徃詔  
之不至遣忻都范文虎等將十萬兵徃征至五  
龍山暴風破舟軍盡沒遂終元世不通云 明

興初方國珍張士誠既滅諸豪悉航海糾島夷  
入寇洪武二年寇山東蘓松旁海諸郡明年再  
入掠閩浙 上遣同知趙秩 諭其王良懷宣  
言中國威德責其入貢良懷以元嘗使趙良弼  
誘而襲我今使者趙姓得無其後欲及秩秩不  
為動語益壯良懷氣沮乃遣僧祖義隨秩奉表  
稱臣入貢 上亦遣克勤仲猷往諭之默其為  
寇掠自如濱海郡縣始苦倭矣於是造海舟防

倭德慶侯廖永忠請備輕舸以便追逐從之七  
年來貢無表文却之九年表貢語悖慢 詔詰  
責之十三年再貢無表以其征夷將軍源義滿  
所奉丞相書來書甚佞留其使不遣明年復貢  
命禮臣為檄數而却之十五年明州指揮林賢  
交通逆臣胡惟庸令日本使僧如珪詐稱貢獻  
伏兵貢艘中計以表裏挾 上即不遂掠庫物  
乘風而遁會事露悉誅而發僧使於陝西四川

各寺中著 祖訓戒後世毋與日本通於是遣  
信國公湯和江夏侯周德興等行海上視要害  
地自南直山東浙福廣東西築城設衛所置行  
都司摘民為兵戍之犬牙盤錯防禦甚周烏永  
樂初遣太監鄭和齎 詔下西洋諭諸海國日  
本首先歸附遣使入貢 上賜冠服文綺給金  
印其王源道義又稍捕諸島寇之犯邊者二十  
餘人來獻 賜賚甚豐封其鎮山曰壽安鎮國



山為文勒石于勒合百道令十年一貢八年道  
義死子源義持立遣使往封頃之我兵獻海  
上俘其酋皆倭人上釋不誅下璽書切責  
之彖持奉表謝罪未幾復寇遼左都督劉榮大  
破之所殺捕甚衆是時我方招徠諸島夷而倭  
乘為寇海上騷然賴是捷遂戢論功封榮廣寧  
伯自是不敢復大為寇而出沒海中伺間侵掠  
不得間則陳其方物詐稱朝貢以為常云蓋自

宣德以後遞貢遞掠反覆不常而我亦取羈縻  
示寬大而已於是倭益肆無忌正統中入桃渚  
犯大嵩焚倉庾民舍劫殺百姓無算縛嬰兒竿  
上沃以沸湯視其啼號以為樂卜孕婦男女剖  
視賭勝負行酒其慘毒尤不可言成化時廷臣  
議却其貢而竟格不行正德四年王源義澄遣  
宋素卿來貢素卿者郵人朱縞也逃入倭有寵  
於王易姓名充貢使其族人相與耳目為奸利

守臣白發之禮臣恐失外夷心置不問素卿厚  
賂關瑾 賜飛魚服遣歸嘉靖二年右京北大  
夫高貴復遣宋素卿至是時國王源義植孱諸  
島爭貢以邀利左京北大夫內藝興亦遣宗設  
貢先素卿至俱留寧波故事夷使以後先至為  
序市舶中官賴恩受素卿財先素卿宗設大怒  
攻敗素卿殺指揮劉錦袁璉大掠寧波奪舟舩  
御史以聞禮臣仍右素卿以給事御史言乃

下素卿獄論死沒其貨絕貢者十七年至嘉靖  
十八年其王源義晴復貢乞易勘合還素卿獄  
不許仍申約貢必如期舟三百人不者却勿受  
然倭終不肯聽嘯聚益繁而內地奸豪往往為  
之嚮導覘我虛實以故敢於深入於是有善王  
直徐海毛海峯之徒亡命跳海變服稱王糾合  
倭舶行賈射利而奸商猾民私為市又不償直  
夷索逋急則吶喝官府陰藉兵驅逐迨兵出則

又陰泄之倭將以樹德倭于是大恨因盤據島  
中我無賴小民迫於飢寒困苦者咸相率泛亂  
東南遂泛此多事矣乃以朱紘為閩浙巡撫紘  
日夜勅兵嚴糾察上章暴勢豪交通狀奸謀稍  
解竟為豪所中以擅殺被逮恚自殺副使柯喬  
指揮俞鏜皆論死繫獄乃罷巡撫而舶主土豪  
益自喜為奸愈甚三十一年犯台州破黃岩象  
山明年犯太倉破上海崇德嘉善諸邑遂更設

提督御史以王忬為之忬經畧摘發頗有所斬  
獲賊遂移犯蘓松無何忬移鎮大同以李天寵  
代而將則盧鏜湯克寬俞天猷也是時倭至無  
虛月屯據拓林川沙窪青村陸涇壩諸處四出  
流劫而拓林賊最劇鏜戰孟宗堰天猷戰金山  
衛天寵合諸將兵戰烏程縣之窩墩別將李逢  
時率山東兵戰新涇橋皆不利三十三年以張  
經總督其事計調廣兵未集而工部侍郎趙文

華以海道猖獗請禱海神 詔即以文華往文

華素質緣太學士嵩貴幸頗指經經不為下文  
華遂勅經養寇并及天寵 詔逮訊經時已大

破賊於王江涇斬首千九百有奇又敗之陸涇  
壩斬首二百七十有奇焚其舟三十餘艘科臣

言宜留經以賊平自效不聽與天寵皆論死於  
是以周琬代經胡宗憲代天寵琬未幾去以楊  
宜代屬文華督其師倭益熾大掠江北焚漕舟

文華戰於陶宅敗績應天巡撫曹邦輔再戰再  
敗其別部自日照登掠贛榆自上虞登掠高埠  
皆不滿百人官兵莫能禦高埠賊轉掠浙西南  
直破南陵溧水橫行數千里殺傷無算至蘇州  
乃滅諸將大猷等逐賊海上頗有斬獲而閩廣  
倭大至三十五年楊宜罷去宗憲代已而又以  
阮鶚代宗憲時海賊徐海入與浙賊陳東合叅  
將宗禮率所部河朔兵與戰於崇德三敗之追



踰橋橋陷兵潰禮死焉賊遂進圍鶚於桐鄉鶚  
固守不能拔乃解去宗憲乃以計厚賂海使執  
東自贖海遂擒東及其黨麻葉等百餘人以獻  
而自率衆營梁庄官兵盡殲東黨而攻海梁庄  
海死別部據舟山擁柵自固俞大猷進攻縱火  
焚之斬首百四十餘級餘悉死兩浙平明年誅  
王直王直者徽人也以事走海上能號召諸夷  
治大舶巢五島中奸商王激葉宗滿等共集衆

相與署置倭之來皆直等導之宗憲欲招直乃  
迎其母妻至杭供待犒慰甚厚高先是郵諸生  
蔣洲者上書督府言能說直使禁諸夷毋內犯  
宗憲許之以生員陳可願輔行既說直直願歸  
服乃遣養子毛臣同可願還報宗憲而傳送洲  
至豐後島其島主稍為傳諭諸島居二歲乃遣  
僧德陽及夷目四十人隨洲入貢宗憲又遣徽  
人羅隆文再往所以遊說百端直乃與俱來御

史王本固疏言不宜招直直懼有悔意宗憲與約誓且遣指揮夏正爲質直乃入見頓首言死罪且陳其與洲戮力狀宗憲慰藉甚至即具狀聞詔誅直始宗憲本無意殺直以本固爭之強而諫者且謂其受直金故宗憲懼不敢爲請直既誅餘黨王激毛臣等殺夏正率餘衆據舟山征之踰年乃解三十八年倭分数道入寇江北巡撫李遂與諸將策曰賊分道過如臯必且

合合則道有三自秦州逼天長鳳泗即 皇陵  
最要自黃橋逼瓜像搖南都而梗漕次之若汶  
富安而東海濱荒涼擄掠無所得至廟灣絕矣  
於是下令諸將令毋過天長瓜像而分兵綴賊  
後賊果走廟灣遠通政唐順之以視師至促戰  
斬獲甚衆無何賊自三沙至副使劉景韶叅將  
丘陞督兵與戰陞陣死景韶乃併陞衆遂又飭  
諸路兵合擊賊大敗走劉莊裨將劉顯與景韶

躡其後遂搗劉莊賊潰追及白駒場賊無一人  
得脫者江北倭患悉平其寇福建者張甚寧德  
福清永福諸邑殘破不能支宗憲檄叅將戚繼  
光往援時賊據寧德之橫嶼阻水為營路險隘  
官軍坐守踰年莫敢進繼光至則令軍中人持  
束草填河進力戰大破之生擒九十餘人斬首  
二千六百餘級焚溺死者不可勝數奪所擄三  
千七百餘人歸乘勝勦福清牛田倭又破之繼

光初至福清邑令及父老請師期繼光曰吾兵  
疲且休矣姑緩圖之賊偵者歸告不為備其夜  
督兵行三十里黎明破其巢邑人尚未知兵出  
也其深謀秘計如此繼光歸賊益肆四十一年  
陷興化復命繼光往討賊聞繼光至欲遁為  
俞大猷所扼不得出繼光督戰大破之殲其巢  
其支黨方寇仙遊連江諸處盡討平之當是時  
巡撫如王誨劉燾游震得相繼撫閩不能立尺

寸功總兵如劉顯遇敵怯不敢戰激繼光幾無  
閩矣未幾廣東倭亦為官軍所敗逃至甲子門  
將奪舟入海暴風盡溺得脫者僅二千餘留屯  
海豐俞大猷湯克寬追之擒斬殆盡倭患遂息  
自東南中倭以來十餘年間中外絳騷財力俱  
訕而倭亦大傷隆慶時海上逋寇吳平曾一本  
等復稍稍勾引入犯閩粵我亦嚴為備旋至旋  
滅非如嘉靖之季矣萬曆二十四年倭奴平義

智字秀吉性最黠襲取諸島擅改倭國山城自稱關白即丞相云遣將平行長及清正等率衆攻朝鮮直抵王京朝鮮王昞遁走遣使告急遂命侍郎宋應昌為經畧往援之副惣兵楊元等師久無功乃命薊遼總督邢玠率總兵李如松如栢劉綎陳璘等五道兵往征之時倭渠酋分屯三路東曰清正中曰石曼子西曰行長而行長尤狡獪盤踞全羅築順天曳橋諸壘關白渡



營南海城陸扼塞軍不敢前劉縉與監軍王士琦謀誘行長出營疾擊之馘倭級千餘行長亟遁歸土舍楊道通尾而馳及城堙門半閉行長闖入道通以槊刺之中其肘甲不入竟逸道通門闔死我軍乘勝遂燔奪其壘又誘關白親信鄭六同為內應同係中國被擄者於是水陸夾攻行長營中益恟亂我兵因奪門入遠石曼子舟師來援陳璘力戰焚其舟於露梁大破之馘

石曼子行長乘間晚遁鄭六同急焚其火藥為  
內應我軍以矢砲感之秀吉遁去遂克平壤二  
十六年七月秀吉病死倭衆以內亂撤兵朝鮮  
遂得復國烏二十八年倭寇福建僉事王在晉  
以身師擊破之論功進一秩自是邊患稍戢云  
其地北跨朝鮮南盡閩浙其主居山城故稱山  
城君山城南為和泉又南為沙界沙界東南為  
紀伊紀伊西為伊勢山城西為丹渡左為攝津

左之西為攝摩右為但馬右之西為因幡丹波  
之西為美作左為備前左之西為備中右為因  
幡右之西為伯耆美作之西為備後之北境出  
雲之南境備後之西為安藝出雲之西為石見  
安藝石見之西為山口谷國即古之周防州也  
山口之西為長門關渡在烏渡此而西為豐前  
其南為豐後又其南為日向豐前之西北為筑  
前西南為後筑後之南為大隅大隅之西為薩

日本  
東卷之一  
三十一  
摩豐後東南懸海為土佐為伊豫為阿波阿波  
相近懸海為炎路土佐豐後之間為佐加關薩  
摩之北為肥後又其北為肥前肥前西懸海為  
平戶平戶之西為五島北為多藝為伊岐極北  
則對馬島諸島皆有酋長山城君弱空名耳倭  
不稟其號令內相攻強則役屬而豐後最大其  
入貢必由博多歷五島而行回則徑趨長門每  
歲清明後至五月重陽後至十月常多東北風

利入寇故防海者以三四五月為大汛九十月  
為小汛其入寇多薩摩肥後長門三州人次則  
大隅筑前筑後博多日向豐前豐後和泉諸島  
土氣溫煥宜禾稻桑麻無牛馬虎豹羊鵲喜盜  
輕生好殺每戰必單列緩步為蝴蝶陳前一人  
揮白扇為進止兵有矛盾木弓竹箭或以骨為  
簇刀極剗利中國不及也又嗜酒多壽男女相  
悅為婚不淫不妬男子魁頭斷髮黥面文身婦

人被髮跣足間用屨俗不竊盜少爭訟犯法者  
沒其妻子大者滅其門戶其死喪無異中國灼  
骨以下吉凶用中國古錢唯不用開元永樂二  
種信巫好戲重儒敬佛其接見以躡踞為恭以  
搓掌為悅飲食藉以櫛葉或用籩豆編草為荐  
文皮為表席地坐卧無几案牀帳渡海時令一  
人不櫛沐不食肉不近婦人名曰持衰若在途  
吉和則予以財物如疾病遭害則以為持衰不

謹殺之所產金銀琥珀水晶硫黃水銀銅錢白  
珠青玉蘓木胡椒細絹花布漆器扇刀劍鎧甲  
貢道故由寧波達於京

外史氏曰倭之狡猾彊狼所從來矣漢晉以還  
猶不敢逞至我明而賊臣倡亂遂啓戎心即  
廣寧一捷稍舒華夏之氣然終不能使之抑心  
弭志豈處置之失宜抑盛衰之遞乘耶頃者王  
京不守弱主奔竄天子赫然震怒命將出師

而平壤之役天奪其魄屬國無恙東土以寧然  
徵兵轉餉中外繹騷矣邇來國家威德遠播  
海波稍恬而愚猶不能無杞人之憂焉餉匱於  
漏卮而防弛於積弱勾引之風日熾而交通之  
禁不行百孔千瘡莫可究詰即三令五申何裨  
實政也嗟嗟天下豈少王直之徒哉借箸之籌  
吾旦暮遇之矣



渤海即靺鞨

渤海姓大氏本粟末靺鞨附高麗者高麗滅率  
衆保挹婁之東牟山地在營州東二千里築城  
郭以居高麗殘衆稍歸之南北接新羅以泥河  
為境東窮海西際契丹唐萬歲通天中契丹盡  
忠殺營州都督趙翽反有舍利乞乞仲象者與  
靺鞨酋乞四比羽及高麗餘種東走度遼水保  
太白之東北涇與婁河樹壁自固武后時詔封

乞四比羽為許國公乞乞仲象為震國公赦其  
罪不治乞四比羽乞乞仲象俱拒不受命后乃  
詔將軍李楷固等將兵往擊斬之時仲象已死  
其子祚榮引殘彘遁去楷固窮追度天門嶺祚  
榮遂用高麗靺鞨兵拒楷固楷固等大敗還祚  
榮因并有乞四比羽之衆恃其地荒遠中國不  
能至遂建國號震國王于是遣使交突厥其地  
方五千里戶十餘萬勝兵數萬頗知書契盡得

夫餘沃沮并韓朝鮮海北諸國地中宗時使侍  
御史張行岌招之祚榮遂遣子入侍睿宗先天  
中拜祚榮為左驍衛大將軍渤海郡王以所統  
為忽汗州都督自是始去靺鞨號專稱渤海云  
玄宗開元七年祚榮死其國私謚為高王子武  
藝立土字益擴東北諸夷畏服之改元仁安帝  
賜典冊襲玉并所領未幾黑水靺鞨使者入朝  
帝以其地建黑水州置長史武藝召其下謀曰

黑水始假道於我與唐通異時請吐屯於突厥  
皆先告我今請唐官不吾告是必與唐腹背攻  
我也乃遣弟門藝及舅任雅相發兵擊黑水門  
藝嘗質京師知利害謂武藝曰黑水請吏而我  
擊之是背唐也唐大國兵萬倍我昔高麗盛時  
士三十萬抗唐為敵可謂雄強唐兵一臨掃地  
盡矣今我衆比高麗三之一王將違之不可武  
藝不從兵至境又以書固諫武藝怒遣從兄壹

夏代將召門藝門藝懼來歸詔拜左驍衛將軍  
武藝使使暴門藝罪請誅之詔處之安西報曰  
門藝窮來歸我詎不可殺已投之惡死地并留  
使者不遣別詔鴻臚少卿李道邃往諭旨武藝  
上書語不遜帝怒後十年武藝遣大將張文休  
率海賊攻登州帝遣門藝發幽州兵擊之使太  
僕卿全思蘭使新羅督兵攻其南會大寒雪士  
凍死過半無功而還武藝望其弟不已募客入

東都刺於道門藝格之得不死遂捕刺客悉殺之武藝死私謚武王子欽茂立改元大興詔許嗣王天寶末欽茂徙上京在舊國三百里忽汗河之東訖帝世朝獻者二十九寶應元年詔以渤海為國欽茂為王進檢校太尉大曆中屢貢以日本舞女十一獻諸朝貞元時徙東京欽茂死私謚文王子宏臨早死族弟元義立一歲德虐為國人所殺推宏臨子華璵為王復還上京

改元中興死謚成王欽茂少子嵩鄰立改元正  
曆有詔授右驍衛大將軍嗣王建中貞元間凡  
四來貢嵩鄰死謚康王子元瑜立改元永德元  
瑜死謚定王弟言義立改元朱雀並襲王如故  
事言羨死謚僖王弟明忠立改元太始立一歲  
死從父仁秀立改元建興仁秀頗能討伐海北  
諸部拓大境宇詔檢校司空襲王元和中凡十  
六朝獻長慶四寶曆太和四年仁秀死謚宣王

子新德蚤死孫彞震立改元咸和明年詔襲爵  
終文宗世來朝凡十餘次彞震死二傳至玄錫  
咸通時三朝獻初其王數遣諸生詣京師太學  
習識古今制度至是遂為海東盛國焉其地有  
五京十五府六十二州以肅慎故地為上京曰  
龍泉府領龍湖渤三州其南為中京曰顯德府  
領盧昱鉄湯榮興六州穢貉故地為東京曰龍  
原府亦曰柵城府領慶鹽穆賀四州沃沮故地



為南京曰南海府領沃晴淑三州高麗故地為  
西京曰鴨綠府領神栢豐正四州曰長領府領  
瑕何二州夫餘故地為夫餘府常屯勁兵捍契  
丹領扶仙二州鄭誦府領鄭高二州挹婁故地  
為定理府領定潘二州安邊府領安瓊二州率  
賓府領垂益建三州拂涅故地為東平府領伊  
蒙沱黑比五州鉄利府領廣汾蒲海羨歸六州  
越喜故地為懷遠府領達越懷紀富美福邪芝

九州安遠府領寧郿慕常四州又郢銅涑三州  
為獨奏州涑州以其近涑沫江蓋所謂粟末水  
也龍原東南瀕海日本道也南海新羅道也鴨  
綠朝貢道也長領營州道也夫餘契丹道也俗  
謂王曰可毒夫曰聖主曰基下其命為教王之  
父曰老王母太妃妻貴妃長子曰副王諸子曰  
王子官號不一大抵皆泐中國而其俗與高麗  
契丹畧同為自營平距京師蓋八千里而遠梁

開平元年王大誣譟遣王子來貢方物以後累  
貢不絕後唐同光二年遣姪學堂親衛大元  
試國子監丞天成元年又遣使入貢進兒女口  
先是契丹大首領耶阿保機兵力雄盛東北諸  
蕃多臣屬之以渤海土地相接常有吞併之志  
是歲率諸蕃部攻渤海國夫餘城下之改為東  
丹府命其子倍為八皇王居之未幾阿保機死  
命其弟率兵攻夫餘城不克而還長興清泰間

俱遣使貢方物周顯德元年渤海國烏思羅等  
三十人歸化其後隔絕不通宋太平興國四年  
太宗平晉陽移兵幽州其酋帥大鶩河率小校  
李勳等十六人部族三百騎來降以鶩河為渤  
海都指揮使六年賜烏舍城浮渝府渤海琰府  
王詔畧曰蠢茲北戎犯我封畧今歆鼓行深入  
大殲醜類素聞爾國密通寇讐言勢迫併吞力不  
能制因而服屬因於宰割當靈旗破虜之際是

鄰邦雪憤之日所宜盡出族帳佐予兵鋒俟其  
剪滅沛然封賞幽薊土宇復歸中朝朔漠之外  
悉以相與勗乃協力朕不食言時將率兵大舉  
北伐故降是詔云

俱遣使貢方物唐顯德元年渤海國高麗王  
 三十人屬化其後隔絕不通宋太平興國四年  
 太宗平青陽移兵幽州其酋帥大驚河率小校  
 李致等十六人卸族三百騎來降以爲河爲勳  
 封歸化縣侯賜名合城得渝府渤海瑛庶  
 悉知臣與蕃以親及漢才於善者每遠其夫奉  
 高麗古語以爲國言其子及孫皆得賜姓以保  
 藩臣雖遠人臣不得回言其法其法其法其法

新羅

新羅即魏新盧國其先本辰韓種也辰韓初有  
六國後分為十二新羅其一云其國在百濟東  
南五百餘里東濱大海魏將毋丘儉討高麗破  
之高麗奔沃沮其後復歸故國留者遂為新羅  
焉其王本百濟人自海逃入新羅遂王其國國  
小不能自通符堅時其王樓寒遣使衛頭朝貢  
武帝普通二年王姓慕容名秦始使人隨百濟獻

方物其俗呼城曰健牟羅其邑在內曰喙評在外曰邑勒即中國之言卽縣也國有六喙評五十二邑勒土地肥美宜植五谷多桑麻果菜鳥獸物畧畧與華同隋文帝時遣使來貢其王姓金名真平文帝拜為樂浪郡公新羅王其先附屬百濟後百濟人多歸之漸至強盛遂襲加羅任那諸國滅之其西北界大牙出高麗百濟之間其地多山俗無文字刻木為信語言必待



濟而後通好祠山神族自相娶食用柳杯若或  
銅瓦男子褐袴婦長襦見人必跪以手握地為  
恭婦女貨販冬作灶堂中夏則以食置水上畜  
無羊少臚羸多馬但馬雖高大不善行初百濟  
伐高麗新羅往援之自是相攻不置後破百濟  
殺其王結怨滋深唐武德四年王遣使入朝後  
三年拜柱國封樂浪郡王新羅王貞觀五年獻  
女樂不受真平卒無子立女善德為王國人號

聖祖皇姑十七年為高麗百濟所攻使者來乞  
師會帝代高麗詔率兵犄角善德使兵五萬入  
高麗南鄙拔水口城以聞善德卒妹真德襲王  
明年遣子文王弟子春秋等來朝因請改章服  
從中國制詔以珍服賜之又請國學觀釋奠講  
論高宗永徽元年攻百濟破之遣春秋子法敏  
入朝王真德織錦為頌以獻曰巨唐開洪業巍  
巍皇猷昌止戈成大定興文經百王統天崇兩

施治物體含章深仁諧日月撫運邁時康幡旗  
既赫赫鉦鼓何煌煌外夷違命者剪覆被天殃  
淳風凝幽顯遐邇兢呈祥四時和玉燭七耀巡  
萬方維嶽降宰輔維帝任忠良五五成一德照  
我唐家唐帝美其意擢汝敏太府卿五年真德  
死帝為發哀贈開府儀同三司賜綵段三百遣  
使吊祭以春秋襲王明年百濟高麗靺鞨共伐  
取其三十城使者來請救帝命蘓定方援之以

春秋為嶠夷道行軍總管遂平百濟龍朔元年  
春秋死泐敏襲王以其國為雞林州大都督府  
授泐敏都督咸亨五年納高麗叛畧百濟地守  
之帝怒詔削官爵以其弟右驍衛大將軍仁問  
為新羅王詔劉仁軌等發兵討泐敏上元二年  
二月仁軌破其衆于七重城以靺鞨兵淳海畧  
南境斬獲甚衆泐敏遣使入朝謝罪詔復泐敏  
官然多取百濟地遂抵高麗南境矣置尚良康

熊全武漢朔溟九州州有都督郡十或二十郡  
有太守縣有小守開耀元年法政死子政明襲  
王遣使者朝乞唐禮及佗文辭武后賜吉凶禮  
及文詞五十篇政明死二傳至興光玄宗開元  
中數入朝獻朝霞紬魚牙細海豹皮又獻二女  
帝曰女皆主姑姊妹違本俗別所親朕不忍留  
厚賜還之又遣子弟入太學學經術帝賜興光  
瑞文錦五色羅紫繡紋袍金銀精器興光亦獻

異狗馬黃金美髯諸物初渤海靺鞨掠登州興  
光擊走之進興光寧海軍大使使攻靺鞨二十  
五年興光死帝尤悼之贈太子太保命使吊祭  
子承慶襲王邢璣往使帝詔璣曰新羅號君子  
國知詩書以卿惇儒故持節往宜演經誼使知  
大國之盛又冊其妻朴為妃承慶死詔使者弔  
臨以其弟憲英嗣帝在蜀遣使泝江至成都朝  
大曆初憲英死子乾運立甫州遣金隱居入朝

詔遣使吊祭冊命之會其宰相爭權相攻國大  
亂三歲乃定于是歲朝獻如常建中四年乾運  
死國人共立宰相金良相嗣良相死立其從父  
弟敬信襲王十四年死無子立嫡孫俊邕明年  
遣使持冊未至而邕死子重興立永貞以後至  
太和間屢入朝貢而朝廷亦數遣使致冊命焉  
至開成五年鴻臚寺籍質子及學生歲滿者一  
百五人皆還之有張保臯鄭年者皆善聞戰工

用槍而年勇健過于保臯保臯以齒年以莖常  
不相下後保臯歸新羅謁其王曰中國人以新  
羅為奴婢頭得鎮清海使賊不得掠人西去王  
與保臯萬人守之自此海上無鬻新羅人者保  
臯既貴年飢寒客連水一日謂戍主馮元規曰  
我欲東歸乞食于張保臯元規曰若與保臯所  
負何如死其手年曰饑寒死不如兵死快况死  
故鄉耶年遂去至謁保臯保臯飲之極歡會聞



大臣殺其王國亂無主保臯分兵五千人與牟  
持牟泣曰非子不能平禍難年至其國誅反者  
立王以報王遂召保臯為相以牟代守清海唐  
光元年王金朴英遣使來朝貞長興四年權知  
國事金溥遣使來自晉以後不復至焉其地多  
山甚險俗無文字刻木為信言語待百濟而後  
通好祠山神族自相妻食用柳坯或銅瓦男子  
褐袴婦人長襦



百濟

百濟即後漢末夫餘王仇台之後馬韓五十四國之一也初以百家濟因號百濟後兼併諸小國遂漸強大其國東西四百里南北九百里南接新羅北拒高麗千餘里西限大海自晉代受蕃爵自置百濟郡又熙中以百濟王夫餘腆為使持節百濟諸軍事宋齊並遣使朝貢自王餘映四傳至牟大宥遣使詣江南請命俱授以鎮

百濟  
東大將軍都督百濟諸軍尋為高麗所破遷居  
南韓地自梁至周皆遣使通貢隋開皇初拜其  
王餘昌上開府帶方郡公百濟王八年遣使入  
貢屬興遼東之役請為軍道帝厚遣之餘昌卒  
子餘璋立大業時遣使入貢請討高麗煬帝許  
之然餘璋內與高麗通和以闕中國後隋亂貢  
使遂絕唐武德間數遣使入貢璋卒子又慈立  
又慈孝友時號海東曾子明年與高麗連和伐

新羅取四十餘城又謀取党項新羅告急詔諭  
解之時聞帝新討高麗乃取新羅七城久之又  
奪十餘城因不朝貢高宗立乃遣使來帝詔令  
還新羅諸城不聽永徽六年新羅訴百濟高麗  
誅鞞取北境三十城顯慶五年乃詔左衛大將  
軍蘇定方等發新羅兵討之虜大敗王師進趨  
新都城復破之斬首萬餘級羨慈挾大子隆走  
北鄙次子恭自立為王率衆固守定方令士超

堞立幟泰開門降定方執義慈隆及小王演酋  
長五十八人送京師平其國五部三十七郡二  
百城戶七十六萬乃析置熊津馬韓東明金連  
德安五都督府擢酋渠長治之命郎將劉仁願  
守百濟城左衛郎將王文度為熊津都督九月  
定方以所俘見詔釋不誅義慈病死贈衛尉卿  
授隆司稼卿文度濟海卒以劉仁軌代之璋送  
子福信常將兵乃與浮屠道琛據周留城反迎

故王子夫餘豐於倭立為王西都皆應引兵圍  
仁願龍朔元年仁軌發新羅兵往救道琛奔入  
壁爭梁墮溺死者萬人道琛保仁孝誠自稱領  
軍將軍福信稱霜岑將軍遣人告仁軌詞甚倨  
仁軌以衆少乃休軍養威請合新羅圖之既而  
福信殺道琛并其兵豐不能制二年七月仁願  
等破之斬首八百級仁願請濟師詔右威衛將  
軍孫仁師為熊津行軍總管發齊兵七千往王

豐斬福信與高麗倭連和仁願與新羅王金法  
敏進趨周留城焚其身四百豐走偽王子夫餘  
忠勝忠志率殘衆及倭人降諸城皆復帝以夫  
餘隆為熊津都督俾歸國平新羅故憾招還遺  
人麟德二年與新羅王會熊津城刑白馬以盟  
仁願等乃還隆亦歸京師儀鳳時進帶方郡王  
遣歸藩是時新羅強隆不敢入舊國寄治高麗  
死武后又以其孫襲王而其地已為新羅渤海



靺鞨所分百濟遂絕其地下濕多山居官有十  
六品俗重騎射解屬文以建寅為歲首尚奕碁  
僧尼寺塔甚多而無道士賦稅氣候溫煖出黃  
漆樹五穀菓蔬多于內地唯無獸畜等物大姓  
有八族島居者十五所皆有城邑其衣服男子  
畧同高麗拜謁以兩手據地為敬婦人衣似袍  
而袖激大在室者編髮垂于後一道出婦者乃  
分為兩云

此書又曰... 卷之五十五... 百濟... 東卷之... 五十五...

霽

霽匈奴之別種與靺鞨為隣理黃水北亦鮮卑  
故地隋時始通中國有兵萬餘人習俗與突厥  
略同亦臣於頡利其渠帥號為俟斤唐貞觀中  
內附